

vers midy, se trouve le lieu des trois Maries, où Jesus-Christ leur apparut retournans du sepulchre, quand il leur dit *Avete, nolite timere*. Là près est le château de Pise, dont a esté parlé : plusieurs se trompent, qui disent cela estre la tour de David : car les ruynes d'icelle et de son chasteau, se voyent encore hors la ville, ayant regard sur la ville, et piscine de Bersabée (sic). En ce mesme chemin se voit l'Eglise fondée au lieu où Sainct-Jaques Apostre fut martyrizé, où logent les Armeniens. Nous allasmes puis voir la maison de Joachin et Anne, pere et mere de la vierge Marie, où il y a une fort belle et grande Eglise qui sert maintenant de Mosquée aux Mores. Ledict lieu et demeure est hors de la diete Eglise, et non où elle est fondée, qu'est un antre soubsterre où il fault descendre par degrés : au retour, tirant vers Occident, se voit à main droicte sur le hault, le palais d'Herodes, où logent ordinairement les Sandiaqui et Gouverneurs de la ville : et à gauche est la maison de Pilate : et un peu plus avant se trouve une arcade tres antique, vulgairement appellée, tant des Mores que des Chrestiens, l'arcade de Pilate : laquelle traverse la ruë, et en icelle y a une fenestre où l'ont dict que Jesus-Christ fut mené aprez avoir esté battu de verges et coronné d'espines, luy ayant donné la robbe de pourpre et le roseau en main, et là fut monstré aux Juifs, disant *Ecce homo*, les quels respondirent *Tolle, Crucifige*. Les quelles paroles sont imprimées et insculpées dans la pierre de la diete arcade, en vieux caracteres, qu'on dict estre Hebraïques : en la mesme ruë est une Eglise, à gauche, qu'on tient estre le lieu où la Vierge Marie se pasma voyant mener son fils au supplice, portant sa croix. Un peu plus avant, entrant en la ruë qui vient de la porte de Damas, tournant à gauche, où il y a maintenant un bain, est l'endroit où Symon le Cireneen venant du dict Damas, ayda à Jesus-Christ à porter sa croix, et où les filles de Jerusalem esmeuës de pitié pleurerent sur luy, ausquelles il dict, *ne pleurez point sur moy, ains sur vous, et sur voz enfans*. On dict aussi que là aupres estoit la maison du mauvais riche : on ne l'asseure pas : tournant à main droicte, à my-chemin de ceste autre ruë, à gauche, nous est montrée la maison de Veronique, laquelle voyant passer Jesus-Christ ainsi exploré luy es-